

泉州府志卷之四十七

循績

明循績一

莊濟翁

張昭

留潛夫

陳章應

張度

黃維清

史福

黃永

莊謙才

鄭懋中

黃廣

蔡惟溥

泉州府志

卷之四十七

明循績

蔣疇

陳安

陳道曾

徐陟

馮穀

張忠

莊琛

趙應

莊濟翁晉江人洪武初以人才舉知寧都縣勸農興學朔

望畢召諸生講解雖閭巷小學亦令悉赴邑庠聽講遠

近聞風而化懲豪猾均賦役脩陂堰造梅川橋秋滿陞

員外郎去民感其惠為建思莊樓

舊志參明一統志
西江志寧都志

張昭晉江人洪武初以監生知遂溪縣庶務脩舉民物阜

安倫學校築陂塘教養兼舉既去而民思之

舊志

留潛夫字文明晉江人宋忠宣公正裔孫也洪武庚戌舉

明經科授揭陽知縣刻獎蘇察興學課士餘俸以佐公

費不入私橐丁艱歸士民思之曾孫志淑

閩書

陳章應字敏達號寓齋晉江人信惠子洪武庚戌辛亥聯

第進士明泉登第自章應與何德舉始章應授榆次繁

峙安邱三縣丞莅官勤敏廉慎常祿外不染絲毫吏才

清節郡邑稱最太祖疑其丞三縣必有貲捕錄其篋無

一錢第得章應母書言鬻田產以給官次遂命陞禮部

泉州府志

卷之四十七

明循績

二

主事洪武十八年命錄百官善蹟著聞者揭于其鄉之

旌善亭以示激勸章應特被旌榜平祀鄉賢孫道曾至

萬歷閒裔孫陳瑛為建旌廉坊于鐵爐廟左

舊志參青州府志陳

氏家傳

張度字孟欽晉江人洪武中以秀才薦讀書國學授錦衣

衛都事永樂初陞監察御史正色臺端巡歷江左交南

肅察貞度人稱其得憲體度初名佛保及自交南復命

成祖嘉獎為改今名疏乞省侍旋歸朝超陞江西按察

使未任卒從惠

舊志參閩書

黃維清字源潔晉江人洪武甲子解元乙丑進士時年方
弱冠歷職郎署以才諳聞陞九江知府特賜勅以往九
江土瘠民漓號稱難治維清廉勤平恕漸著治績卒于
官遂家焉舊志

史福字德有晉江人繇鄉貢歷事刑部有能名洪武二十
二年遣諭天下武臣比還奏對稱旨遂授兵科給事中
奉勅視鳳陽山陵竣事入朝復有言太祖嘉納之擢四
川按察使方覲遇疾連歲乃瘳及入京師吏部欲置之
法太祖知其才降松陽令松陽民暴而好爭福至痛繩

泉州府志

卷之四十七

明循績

三

以法召見父老問政所急有所罷行民咸安之政滿以
最聞懇歸養永樂甲申復起授河池令未上官時縣幕
長凌暴其民民相踵竄匿山谷間幕長權以民叛白府
聞于藩閩韓公觀觀即發兵捕之兵入境福適至民知
其爲新令也奔走來訴福馳告觀曰民實不反官急租
賦聊走避耳觀驚愕曰不得君言生靈幾禍遂命返兵
未幾丁艱服除赴京時車駕方北巡福以才能被選扈
行在頃補滄之慶雲令尋卒于京師子鍵雷州府同知

黃永由永春徙居晉江少爲諸生洪武中以事被逮至京發戶部充吏因與簿書習法律尚書試而奇之用人才薦授本部主事陞員外出守寧波節冗清獄鋤盜安民考最調守湖州屬歲飢設法賑貸脩築水利豐年倍入復調廣信清操不渝致仕歸僅營一宅曾孫綬元孫光

昇裔孫喬棟琰

舊志參永春志

莊謙才字宗美晉江人洪武丙子應天舉人丁丑聯第進士授行人陞刑部主事歷郎中凡讞獄未平者悉取正焉永樂丙戌擢山西叅議賑勞匱理冤獄黜冗秩鋤豪

泉州府志

卷之四十七

明循績

四

梗作與士類晉人稱爲莊夫子已丑董工北京屢著成績廬陵曾榮曰作息有常勸懲有法宜同官皆推遜也夷子獻最太原父老萬餘人攀轅歌之曰鳳凰鳴兮高岡梧桐生兮朝陽光風兮蘭佩士君子兮周行辛丑改湖廣叅議時建都需材轉運絡繹謙才每二十里置安樂所設粥具藥以濟不給人賴以甦洪熙初以老告歸賦詩見志曰解組歸來七十幾眼中白髮故人稀親朋若問當年事臺闕會看對紫薇自號桃源主人所著有

桃源集若干卷

節莊氏家傳

鄭懋中名醇以字行晉江人由太學生領洪武丙子應天鄉薦建文中知程鄉寬恕廉慎有猾吏爲民害首按之訟者委曲開諭令其感悟不施鞭朴詞訟日簡民頌之曰禁令不煩徭役寡昔無羊今有馬初縣民鮮知學懋中至作新規條親爲生徒講解自是始有登第者嶺南吏治以懋中爲最與瓊州守王伯貞齊名一日感疾戒其子具湯沐召吏章華等謂之曰凡茲吾民爾善視之毋傷吾意言畢正衣冠端坐而逝民哀慕之昇喪歸葬立像於漢令曾芳之祠合祀焉

舊志參廣東通志

泉州府志

卷之四十七

明循績

五

黃廣字文溥同安人建文壬午以貢入太學永樂閒歷知德慶州署肇慶府事興學校均徭賦招逃亡減鹽鈔民賴其惠雖強梗徭人亦聽撫復延名儒脩郡志上官嘉獎士民祀之名宦家居爲本邑奏除荒田歲賦五百餘石鄉人德焉沒祀鄉賢

閩書參廣東通志德慶州志

蔡惟溥晉江人永樂癸未甲申聯捷進士授香山令性沉重喜怒不形撫集流民百廢具興邑有豪惡號三虎悉捕誅之間里以安擢知欽州興教鋤強勤於撫字一州

稱治

閩書參廣東通志

蔣疇字嗣昭南安人早喪父家貧力學授徒自給郡守胡器試其文大奇之俾入邑庠永樂乙酉舉人壬辰進士任監察御史貞度肅僚凜有風采所按部貪墨吏先拔家而去其審覆多所平反丁母憂卒于家

舊志

陳安字克成晉江人宋俊卿之後永樂辛卯舉人乙未進士榜姓林復本姓授工部營繕司主事以才行聞陞衡州知府爲政清簡屬歲飢安不待報開倉賑恤衡有虎食人移檄城隍驅羣虎至其食人者俛首安前命杖殺之而放逐其餘尋丁內艱服闋改重慶後患足疾民苦

泉州府志

卷之四十七

明循績

六

遮留之扶曳而治者幾二載竟以老疾辭歸卒年八十泉中稱一時士大夫朱鐸長於文章而安長於政事孫

初元孫詔

舊志參閩書
雍正殘稿

陳道曾字端誠晉江人章應孫性資朴茂邃於易旁及諸經子史有文名操行卓然不苟徇流俗永樂丁酉戊戌聯成進士選庶吉士自陳願受學職授吳縣教諭陞瑞州府教授持已以正教人多術不爐不扇有古人風遷無爲州學正教如江左右爲湖廣浙江山西考官俱以公明稱卒于官所著有吳下集筠陽濡須等集元孫瑛

徐陟字升高晉江人永樂庚子第二名舉人授興寧令山
邑劇陋節省區畫正身率物潔已八政平而訟理俗
更而化成莅任四載一錢不入官署民有樂只之歌方
報最遠以疾卒于官殯殮無資邑人節趙金襄其事德用

撰志

馮穀安溪崇信里人永樂庚子舉於鄉任信宜知縣民有
兄弟訟田者諭之曰兄弟手足也田地衣食也戕手足
而得衣食於汝安乎遂相讓而退莅任三年民俗丕變

泉州府志

卷之四十七

明循績

七

以善政稱居鄉有爭地者來獻諭之曰爾與人爭我受
爾地是我爭之也不可其人恧然而退閭里亦感化又

脩砌石道十里行人德之

安溪志

張忠晉江人永樂二十年由太學生擢監察御史有能聲

陞廣東按察司僉事累平賊寇以靖地方致仕卒

前明一統

志

莊琛字廷璽晉江人宋少師夏之後研精經傳子史尤工

四體書永樂甲辰入貢成均祭酒陳敬宗以琛筆法適

勁乘傳簡進中書繕寫誥勅正統己未授官大理寺右

評事奉命賑邊道經武邑邑令長博士乞書夫子廟額以絲縑白金致謝琛却不受廷臣及翰林學士長洲劉鉉諸先正聞之皆嘆曰莊大理當受不受所不當受寧受之耶擢廣西按察僉事矜恕廉謹上下咸宜景泰癸酉詣闕行慶賀禮事竣乞歸卒琛生平篤孝遇二親諱洎已生辰悲泣終日或有珍味潛然不御曰昔者吾親未嘗享此琛翰墨精妙獨步一時正統中京師碑碣大文多出其手館閣諸公皆遜謝不及子楷闕書

趙應字孟敷晉江人弱冠爲邑諸生以註誤謫爲吏宣德

泉州府志

卷之四十七

明循績

八

閒授南昌典史當道薦擢浮梁知縣拊教善良痛懲狡猾縣東南有青峰渡灘水悍急恆覆舟應具牲醴爲文以祭水神其患遂息秩滿解去民列狀乞留從之陞秩六品仍知縣事再滿秩丁內艱去服除致仕年八十四

卒舊志

明循績二

李 珙

詹 靖

莊 敏

張 寬

諸葛隆

謝 光

陳雅

劉仲脩

何祐

李煜

王昶

李汝嘉

張茂

莊楷

謝寧

平

丁華

李焯

楊澄

傅凱

郭濬

留芳

莊槩

李珙字廷璧南安人正統初由監生知蕭山縣廉潔公勤

泉州府志

卷之四十七

明循績

九

興學均賦俗生女多不舉珙重法禁之民莫敢犯者後
生育漸蕃婚嫁以時民深德焉景泰元年奔父喪歸民
泣送如去父母為立生祠服闋改廣西懷集值寇亂盡
心保障任滿去民多買舟送出境焉

舊志

詹靖字邦寧安溪人縣令敦仁之後正統辛酉舉人及景

泰間初任廣昌知縣縣人有揭姓者素豪黠前令不能

制靖至寘諸法縣境肅然廉慎之操六載益勵嘗曰居

家如是居官如是若為貴富謀非所學矣後陞開州同

知卒于官孫源曾孫仰庇彬

舊志叅
閩書

莊敏字廷功晉江人正統辛酉舉人乙丑進士任吏科給事中骨鯁立朝嘗陳六事深得大體帝嘉之賜以五經等書景泰元年出守雷州威儀嚴重喜怒不形政務恬淡人不見其有爲而事無不治尤注意於學校以疾辭歸詔加秩致仕元孫奇顯

舊志參
閩書

張寬字洪肅一字海容號慎齋晉江人正統丁卯舉人授富陽訓導遷荏平教諭應天府教授丁內艱起補台州府教授四擁臯比以醇誠儒雅爲名博士所至與諸生講易娓娓皆性命真宗臺使者輒署上考而宦情甚淡

泉州府志

卷之四十七

明循績

十

自陳乞休諸生擁道挽留車爲阻抵家惟圖書數篋築精舍課子孫嘗自題曰質不美惟困學而知貌弗莊惟正道自持偶由科日幸際明時旣未能明乎衆理又何以決乎羣疑勉脩厥職焉敢虛糜但聽天之賦予奚較位之崇卑有司表其坊曰獅霄所著有遺訓勒諸家乘臨歿書寧儉寧戚之句粘之廳事

閩書參張氏家傳

諸葛隆字思懋晉江人正統十三年賓興太學天順間授寧海令寬和簡重不威而治莅政清謹勞心撫字凡百徵發一循至公民稱慈父數十年通逃聞之皆相率復

業秩滿以母老乞休邑士民遮留數千涕泣而別子麟

駿

閩書叅浙
江通志

謝光字文耿號毅齋晉江人正統閒歲貢卒業成均天順三年授睢州牧建學宮戢奸盜是歲大熟有嘉禾合穎之瑞冬少雪竭誠祈禱至夜闌雪盈尺睢戶四萬一考後增至七萬流移盡歸田賦四千增至七千逐末盡農宗室奏奪民地遣內臣追給光奮身奏請塞其事秩滿上官交薦成化己丑擢潮府守勸農桑興學校增窩舖數百以利行旅備糧儲四十餘萬以防災稔值上中下

泉州府志

卷之四十七

明循績

七

外莆隄決脩築石磯三十有二以殺水勢涵溝一十有六以洩于海重建廣濟橋亭屋鼎新府署海陽縣學有饌堂故址卽其地建後堂購學西民地以建饌堂號舍百廢具興海寇羅劉寧作亂數載郡邑莫能制一鼓討平之獠賊曾秉寬鄭金龍鄭金牛等據巖洞出沒流劫饒平黃岡等村檄巡檢魏志統率鄉兵擒其巨魁九十餘人誅之又賊首黃萬寧遺孽黃阿三作亂親入其營招撫之不動于戈賊首盡獲餘黨悉降地方以靜國戚王彬攬市貨物爲民患不避權勢親自擒治之豪紳欲

占民地一區數十家幾遭折毀力阻其請民得安居任
五年而庭生瑞芝又三年而池產瑞蓮民爭獻頌丁繼
母艱歸沒後廣東布政司張瑄巡撫閩省稔光治行題
請崇祀鄉賢命郡守徐源爲建坊於里門額曰良二千
石節廣東舊通志參
李竹坡三瑞圖序

陳雅晉江人永樂閒貢正統中任宣城丞潔已愛民攝縣
事值大旱引罪責躬枷項自署曰皇天不降雨陳雅不
開枷靈澍尋應縣界蒙澤歲賴以稔閩書參
江南通志

劉仲脩泉州人正統閒任崇明主簿寬而有惠不事苛察
泉州府志

卷之四十七

明循績

三

凡第賦役高下各得其平民悅懷之秩滿去仕至工部
主事姑蘇志

何祐字天錫晉江人正統閒應貢入太學授建陽衛經歷
陞儋州同知祐治儋廉謹夷曠興教事除苛政有訟立
決無繫者決之時先以教戒而後量懲之訟者不之州
長而之儋上官每閱祐所理訟牘必稱善初儋人通徭
蠻數反覆爲盜祐出榜文誘勸之語以天下無有白頭
之盜聖世無不南面之民民皆化爲良善居久之自免
歸與朱鑑楊輿朱鐸溫良相過從以老舊志參
閩書

李煜字秉常號勤齋安溪人森次子景泰庚午舉人春闈
乙榜署羅源縣教諭值沙尤寇亂學宮傾毀捐貲重建
大成殿明倫堂暨東西廡煥然一新課督諸生維勤不
受贄餽改江西南南城諭教一如羅源陞南豐令詢利害
為興除之築通濟橋民免風波衆立石紀功復建壇壝
與曾子固書院設舖舍建衆安亭政績載太史劉青齋
太常卿程廣平碑豐人祀名宦今祀鄉賢安溪志卷
羅源縣志
王昶晉江人天順四年任程鄉知縣時巨寇羅寧等相繼
作亂昶密計領兵剿殺之民賴以安潮州府志

泉州府志

卷之四十七

明循績

十三

李汝嘉字士美晉江人天順己卯舉人甲申進士授戶部
主事出納勤慎時有貴幸侵民田者命覈之得實奪以
歸民後權湖湘商舟清兩廣財賦搜剔奸蠹無敢干以
私陞員外郎尋陞金華知府道聞母喪歸復除衢州莅
政寬平脩建郡邑學均徭役賑貧乏葺武備雪冤滯建
橋梁衢人頌之事蹟俱載衢志後陞浙江叅政致仕祀
鄉賢子繼芳舊志
張茂字敏實惠安人天順間以貢入太學矜莊端謹用氣
節自砥授桐廬丞專以恤孤弱釋冤濫為心民有繼母

告子不養已者茂問繼母自有子乎曰有然則何不安受其養而告前子曰宜均養茂問前子亦既養之矣但泣言母弟害之茂廉得實給母曰子不孝殺之母叩頭謝茂命痛杖之母色喜卽召杖其少子曰子不孝弟不恭皆不可容母奔號請代茂怒曰杖前子則喜杖已子則號不慈孰甚焉益治母遣之其後母欲虐前子輒爲少子勸止一邑稱平有猛虎晝噬人茂曰豈吾有苛政致此乎移文告城隍自責虎遁去中使入閩陵轢沿道州縣將至邑令避不見茂曰丞自當之及入不爲禮茂

泉州府志

卷之四十七

明循績

六

瞠目責之曰七且郎官自朝廷外無不爲禮者中使坐自如朝廷耶徑趣出頃之中使盛有取索茂曰舟則有之竟不能加巡按荆茂按部至縣召之講論經學曰君儒者也奈何屈此檄與秋闈閱外簾文字有友人沒京師子火骨以歸過縣茂迎骨入廨設酒殺哭奠家人謂不祥茂曰設吾友生而過我不延欸之乎年六十致仕歸以文公家禮教子孫叅據禮經酌以土俗著爲成書

年七十九卒子綸

閩書叅
惠安志

莊楷字世範號慎菴晉江人僉事琛子天順壬午歲貢試

第一卒業南雍成化丙戌入粟六百石需次天官陳泉
州宿弊六事曰興復書院以興教化禁取牡蠣以固橋
梁守令題名以示勸懲脩刊郡志以存故典除毀窩寨
以消賊名分置惡疾以祛民患皆有補於時政多見採
納授德慶州州判性度愷悌學問優長加意學校捐資
與知州管淳鼎新大成殿雲章閣復請於督學趙世用
建先正祠舉祀名宦人物於小民尤加意撫字刊冠昏
喪祭圖以範俗脩復廟宇以妥諸神重建孝通橋以免
病涉勵俗有訓勸農有歌士民揭之楹閒相與傳誦先

泉州府志

卷之四十七

明循績

五

是州境盜起城池弗固田荒學廢居民襍夷自楷泣任
後城完盜息田墾學興夷俗丕變在任三年一清如水
壬寅部運糧價至京復陳德慶宿弊六事又多採用上
官方以廉能薦時子已登賢書遂告歸抵家杜門謝客
詩酒自娛脩族譜錄先世宦跡曰白里莊氏繩武集葺
墳塋建祀田置祭器定祭品伯父無後爲立嗣諸弟孤
幼者撫之成立性灑脫不拘勢利宦歸琴書外無長物
林居幾二十年惟纂集先代遺文及當朝大家制作臨
沒謂其子曰吾平生所爲無媿本心無玷祖宗無媿所

學所恨少師公之田久假於人而未復耳所著有文集
行世子熙成化癸卯舉人任知縣採德慶州志參
祭酒鄭紀撰誌

謝寧字安世惠安人天順己卯舉人成化丙戌進士授揭

陽知縣方廉明斷折獄如流雖豪宗不少假借丁外艱

改江陰邑素稱富饒財賦充羨寧廉潔愈厲不私毫髮

興建社學選老成莊雅之士為之師月試歲課俱有成

法歲苦旱寧齋沐素服徒步禱于山川雨隨如注至秋

水暴溢壞民廬舍民告飢又發粟賑之寧為政大率主

興利便民凡聽訟必盡兩造之情不鈎距苛刻以立威

泉州府志

卷之四十七

明循績

六

取名至久人愈信愛居六年陞刑部主事卒于官江陰

人立廟祀之子平宏治辛酉舉人樂昌知縣詩翰傑秀

可觀舊志參
閩書

丁華同安人成化丙戌貢士授封川知縣剛毅果斷省節

浮冗九年考滿民不忍舍力請當道再任三年乃去閩書

參廣東
通志

李焯字秉潛號翠巖安溪人森第五子成化壬辰歲貢卒

業南雍授廣東南雄府推官秉公持平嘗督鹽法商賈

稱廉為民禦寇築土城七百餘丈備徒工作斂弗及下

都憲韓雍獎薦六載奏績乞休歸撰家譜以示後嗣門
無剥啄有夜竊其稻數十斛或請搜焉笑曰盜者爲貧
被盜者未卽貧也何搜之爲子廷封官廣西宣化主簿
有惠政

安溪志

楊澄字文瑩號素履又號纓湖散人晉江人入德化庠成
化丁酉舉人授膠州學正轉景州擢國子監助教陞南
康府通判郡有救風渡奸稍實淹溺其人而利其有一
日有以拾獲船貨報者澄問商人安在答曰已溺于水
澄曰豈有能得其貨而不能救其人者必皆汝輩害之

泉州府志

卷之四十七

明循績

七

展轉窮治力除積弊商人立祠渡傍祀之歷官二十載
歸家惟經籍數十卷清貧如故陶然自適焉

南康府志

傅凱字時舉號敬齋南安人少年材器拔萃究心易學成
化戊戌舉進士授戶部主事提督天津等八衛督催南
畿浙福財賦以賑西北饑旱事集而民不擾轉郎中謝
政歸日與諸士講習四方求文者踵至子浚

閩書○按
異林凱嘗

爲行人使異域
而閩書不載

郭濬字本深號蘭谷晉江人爲羅一峯高弟融貫春秋三
傳尤精於易成化辛丑歲貢任遂安訓導浙俗生女多

不舉濬申飭生徒反其俗多有化者秩滿歸與蔡清李
聰相友善二人皆兄事之親贊其像擬以古人持身嚴
峻不輕取予郡大夫嘗沒尼庵給教鄉子弟濬曰是利
其有也卻之

閩書叅
家傳

留芳字汝礪號毅齋晉江人宋忠宣公正之後成化癸卯
舉人授南雄府通判五嶺咽喉百貨會通暴客時禦奪
爲患故有是員芳適值初設首事維艱之綱之紀偵捕
靡遺未幾風令大行狐鼠寢伏聲譽焯起委署郡篆益
有樹聞五載丁內艱服除念父老不復出芳貌偉神俊

泉州府志

卷之四十七

明循績

六

莊夷簡恪居無惰容學有蘊蓄爲文鏗然可誦泉俗喪
葬華侈居母喪獨刮去俗態自退居杜門不預外事與
同志爲洛社遊年七十一卒子志淑

採林次
崖文集

莊槩字世平號遜菴晉江人宋少師夏之後僉事琛子成
化閒歲貢知陸川考績改信豐有風槩蔡清嘗受業焉
其令信豐清爲序送之曰業師遜菴家素貧用素約不
獨未仕爲然尹陸川六年貧約如故先生博學高志少
年聲光馳八閩閱世益深抱負益壯所養益不凡其所
施爲不以當之崇舉地之廣狹限者可知其人矣

閩書
叅蔡

明循績三

洪元

黃鏐

莊科

田崑

王鏃

黃天賜

黃天爵

傅浚

洪聰

陳寧

黃寬

張慎

黃瑗

林潮

泉州府志

卷之四十七

明循績

充

莊昌期

張文應

王奇橙

莊希纘

林鉞

尤復

陳奇

郭克一

洪熊

蔣孔煬

吳希澄

謝崑

伍鎧

韋尙賢

李璫

洪元字善至南安人弘治初由郡學生入國子監辦事

漳爲將仕佐郎具文武才凡有劇務邑令必進而商之
咸得當一日過高坂橋夜有巨盜數十火劫其鄉元率
鄉人追之獲一盜曰劉虎鞠之乃渠魁素知名者郡邑
屢捕之不可得因欲窮治其黨元力止之祇殲巨魁上
之當事當事高其才識列之薦章未及遷而卒鄉人思
其恩醵金贈行大方伯楊道會爲之傳

南志

黃鏐字于宣晉江人宏治癸丑與兄銘同登進士授南京
戶部主事轉禮部郎中擢守思恩軍民府思恩故土官
岑氏世襲民夷雜處及岑氏敗改設流官餘孽猶時跳

泉州府志

卷之四十七

明循績

二十

梁鏐至悉擒捕之梟其首仍團結保伍令民緩急相救
增設縣治定稅額均徭役建學校置驛道治如內郡由
是夷氓不敢肆騫三年移守桂林考滿丁外艱歸卒于

家

舊志

莊科字由矩晉江人宏治乙卯舉人教長沙平湖二學正
德閒擢知開建縣崇學校闢田野興利除害民懷政教
峒猺嘯聚攻城科整衆登陴露刃持滿賊趨趨不敢前
賊退人以多科功科曰禦寇之道安民爲本令民心完
固何賊足虞於是詢民所甚利害爲之因章民告便而

徭亦伏以才改任順德處劇以暇尤見其長歷南京刑部郎中終高州府知府姪應禎

閩書參廣東通志

田崑字景玉晉江人崑弟宏治乙卯舉人授均州知州值凶歲軍興多方招撫賑濟民賴以活而流移者復業武當山鎮守中貴貪虐民不堪命極力抗制中貴怒欲中傷之例州官朔望謁山道士當出迎中貴人令道士故不為禮以激崑怒伺崑欲笞道士遂毀醮壇萬歲碑誣奏崑悖逆逮繫至京逆瑾用事構成重獄大理卿燕忠疏雪其誣乃得釋竟削籍歸均人謠之曰太守憂民苦

泉州府志

卷之四十七

明循績

三

奮身抗猛虎直道古難容名位棄如土祠之名宦

舊志

王鏃字子鋒號巒山晉江深滬人天資穎敏遊于蔡清之門篤志勵學成化丙午舉人宏治丙辰進士深滬濱海民居聯絡皆以漁為生其讀書登第自鏃始由是髦士彬彬初授宜興縣為常郡劇邑至則均徭役時賦歛剔奸蠹不留獄太湖盜發剽劫焚慘鏃聚眾備禦訪宋元水寨遺址立堡二十建警樓十二募丁壯守之寇至合剿去則歸農兵不知勞盜不入境民以安堵臺使者最其能陞南京大理寺左評事轉寺正讞獄明慎擢惠州

府知府政聲嘖嘖未幾歸銜孝事繼母篤愛異母弟建祠祀始祖至高祖充田租八十石以供祭費深瀝雖烟火稠密民不知兵海寇常肆掠室廬俱被殘毀聞寇至悉奔竄銜倡議曰以吾鄉數千之衆累困於一二百之小醜弱孰甚焉曷不嚴防禦之策乎乃親閱鄉丁之壯者編爲隊伍利器械授戰法而約束之臨敵退縮者重其罰賊不知其有備也復來寇衆用奮而擒之無遺類焉自是賊不敢窺其鄉人謂銜之賜也卒年六十九

採顧

新山文集參
常州府志

泉州府志

卷之四十七

明循績

三

黃天賜字于和南安人宏治戊午舉人正德閒知英德縣剛正嚴明不畏權勢時中官遣取英石賜曰此石何益於用徒勞民耳倘羨其瑰瑋請詣九疑觀之更爲奇特卒却之及調去民攀號車軹祀名宦

閩書參廣
東通志

黃天爵字希仁從蔡虛齋學因號潛虛南安人宏治戊午已未聯第進士南邑黃姓登第自天爵始甫觀政卽以親老引疾歸父疾篤屏僕御躬自滌穢扶擁搔撫晝夜不離比歿哀毀異常喪葬如禮起補戶部主事蒞事勤慎尙書劉公稱其心存公務事當人心秩滿陞刑部員

外晉郎中嚴明爲同官最擢廣東副使有滯獄疑於法
爵至輒訊折之人服其神尤喜植善類粵人畏而愛之
丁繼祖母艱起補湖廣副使留心學政水利士民勒石
頌德力請致仕歸而營宅西埔卽蔡虛齋所授地歲奉
祀事甚謹待異母兄弟如一族中老貧幼學咸推橐惠
之愛母家陳尤摯撫遺孤嫁二女葬二喪購廬代奉其
先焉性寡言笑外直內寬未遇時偕妻歸寧其同襟李
已貴顯禮待頗異妻拂然促天爵偕歸勵志讀書及貴
妻尙留憾而天爵已忘之矣功姪河清在銓部常欲推

泉州府志

卷之四十七

明循績

三

以督學力辭焉人服其品行子自勉曾孫南金師顏

江

集參南

安志

傅浚字汝源號石涯南安人凱子性謹厚宏治己未進士
授戶部主事丁父憂爲逆瑾矯旨削籍瑾敗起工部虞
衡員外郎進郎中理薊州鐵冶釐草宿弊省鐵竈費三
之一遂爲定制改都水慎出納不徇私請鄉長將賂中
官屢索羨餘浚不應爲所排出爲山東轉運同知卒于

官子穢

舊志

洪聰字謀甫晉江人宏治乙卯舉人壬戌進士正德未知

南安府性有執持甫莅任值大駕南巡藩司諭預處上
供費聽上牘以地僻民寡不及他郡一縣力請減損議
未決而駕已旋郡以無擾屬邑佐有怙當道勢虐民者
執之民稱快反被註誤後事白卒於家

閩書參
西江志

陳寧字士泰號介菴晉江人宏治戊午舉人壬戌進士知
東莞縣束書數篋赴治性剛方不畏權勢至則以吳隱
之飲貪泉詩爲佩符曰不如是則氣餒畏人何能排天
幹地未旬月百務具舉東莞舊有堅訟寧訊立洞大批
數語兩造俱服一境皆驚有作神君詩頌之者寧曰吾

泉州府志

卷之四十七

明循績

三

非能神吾得其意於春秋焉擢節人情天理而輕重吾
權衡於常律時例之外執律拘例者不能吾制焉耳矣
由此問左之老猾豪右皆惕驚蹙縮不敢出繩墨邑以
大治政暇左經右史尤邃於易學每俯讀仰思有一得
卽入邑庠召進諸生課試之以所得發其疑使各自思
而因以授之鄉社窮鄉遐里皆知向學年三十四卒

閩書

叅紫峰文集廣東
通志東莞縣志

黃寬字純裕號畏菴晉江人宏治甲子舉人授陽春令政
尙寬大學宮公署次第脩葺又於厲壇之側築漏澤園

士民稱政無愧其名值黎人弗靖屢討未平主將以寬
得民囑統民兵協攻之民奮力爭先一戰而克撫按表
其清慎愛民仗義討賊例應陞士民遮道乞留復疏
請留粵補授肇慶府通判購義塚於東郊以爲無力者
藏又置義田四百戶分爲二倉一濟士一賑民衍常平
法春借秋還視年歲豐歉遞減其息凶年則全蠲之士
民沾惠建崇聖鄉賢名宦各祠脩城隅橋諸廢具舉士
民伐石勒碑立功德亭爲祠祀焉肇慶志載入名宦弟

瑗

閩書參廣
東通志

泉州府志

卷之四十七

明循績

三五

張慎字公謹惠安人綸之子宏治甲子舉人知英德縣廉
明簡靜先教化後刑罰痼疾民隱搔爬利病邑當水陸
之衝痛節浮費酌迎送定規尤亟興文教正禮俗毀淫
祠黜虞美人祠山洞有虎患禱之而息富民好詭田墾
賦慎好諭之令各以多寡自實履畝編賦民不爲擾聽
訟多便民情願釋者聽然必爲畫牘以杜後爭值亢旱
有訟水利者必冒暑決之民間小訟亦爲悉心聽察曰
小民見利必爭不爲結斷爭無已也宋唐介謫英州別
駕慎得縣北龍山書院遺基建祠祀之前開講堂旁列

齋舍以居諸生政暇爲講論經旨及古人行誼卒于官
上司議祀之名宦縣人卽龍山書院祠之曰張公遺教

在是子岳峯

閩書參廣東
通志惠安志

黃瑗字純玉晉江人宏治辛酉舉人乙丑進士知長山縣

時山東旱蝗瑗多方賑濟隣境飢民來就食者萬計有

老嫗子商販戍于盜瑗計獲真盜寘之法人服其明青

■有疑獄潘臬多檄瑗鞫之無不得其情陞戶部主事

歷員外郎中擢守肇慶存心撫字脩隄防輯戎事恩平

賊蘇寓唐國欽相繼作亂率民兵剿滅之以功進三品

泉州府志

卷之四十七

明循績

三

秩既而廣西盜起瑗復統肇慶之兵會捕之暇日與士

大夫浩歌雅論人稱瑗之德無愧其字云以疾卒

舊志
參廣

東通志肇
慶府志

林潮字君信號沙溪晉江人其先自仙遊沙溪遷晉江故

以爲號宏治辛酉舉人乙丑進士乞歸養觸權璫劉瑾

怒坐廢瑾敗起除台州府推官執律以拒監司弗徇大

吏風旨滿考囊橐蕭然擢御史正德中戚畹內侍多寵

倖驕佚踰制靡有顧畏獨喜結言官有私與爲好者珍

玩重賄無所愛潮閉關掃軌無權貴之交門外悄然出

按江西宸濠數侵之不能奪謁見不以朝服不以朝禮其子便殿曲宴不奉觴爲壽御史范輅爲濠所中逮疏救之時濠方包逆謀多爲不法而飾小行以沽名喪其親善哭聲動宮庭徒步送葬潮與都御史孫公籌所以遏折備防之謂其謀不可測旣難驟發且可因其僞而與之使益飾以自匿或不爲逆卽逆猶可少緩其發而徐爲圖遂僉以疏入言濠有孝行宜加褒示勸及潮去未幾而變作朝議以潮畏禍徇宸庶人之意以苟免竟坐廢歸歸樹德於鄉三十年孝於親友於兄弟其實

泉州府志

卷之四十七

明循績

二十七

行內脩感人者不徒以言故人無不化年八十一卒

採王

遵巖文集

莊昌期號清慎晉江人少卓犖有奇氣學行文章爲泉所推領宏治閒歲貢不卽授官曰吾當友天下之善士乃就太學與諸賢豪遊行日益尊處里閑宗黨中見義必往如飢渴之赴飲食授全州州判救荒緩賦寬逋息刑全爲廣右肘腋時猖賊猖獗州治戒嚴昌期率衆捍禦以身當其鋒賊黨盡平竟卒於官全州之民罔不悲涕

莊方塘撰傳

張文應字廷鳳號南溪晉江人治春秋學義據通深讀三傳者多師之正德丁卯鄉薦第二人以母老就瑞安教諭操履方正學識淵宏啓迪諸生寒暑無閒講學興禮敦尚風化多士蒸蒸向義遠逮平陽永嘉青田龍泉諸邑聞其經學淵深文質競爽皆負笈恐後遷樂平知縣邑當姚源寇甫定之後公私交匱逋負山積復有悍藩權璫誅索無厭文應撫摩綏輯酌分緩急約法簡而恩信著民慶更生夜有禦人近郊而取其貨者問其家曰雞鳴時誰邀而夫者得其名掩捕一訊所禦金尙在亟

泉州府志

卷之四十七

明循績

二十六

杖斃暴其屍邑驚爲神脩邑志立社倉祠烈女平鉛山之變誅其魁宸濠稱亂有從師勤王功總憲孫姚江謂其一廉激俗六事孔脩王文成公守仁奏功錫宴有氣節凌霄忠誠貫日之褒以母老乞終養士民遮道慟哭者萬餘人歸途惟敝衣破屨越八年樂平之民復裹糧赴闕陳保旣不獲則勒石紀政祀名宦歿後里中亦祀鄉賢子天衢仕訓導有學行天叙嘉靖辛卯舉人兩任

知縣

閩書叅溫州府志張氏家傳

王奇橙字良實惠安人正德丁卯舉人授石首教諭嚴條

教勤講解自是科目漸盛壬午分校浙江取士得人擢
知益陽縣廉謹自持出格招撫洞庭劇盜盜率徒黨數
百伏庭下願爲良民遣使復業縣人勒文紀功未幾卒
囊橐蕭然巡撫檄厚資之子以佐廣文先生朴古君子
也以寧嘉靖戊子舉人孫約

閩書叅
惠安志

莊希纘字邦孝晉江人正德丁卯舉人嘉靖二年授陽山
令平易近民不務敲撲嘗脩韓公臺捐置田十畝爲祭
資旣去而民思之勒石臺畔頌德焉

採廣東
通志

林鉞字宏用晉江人宏治甲子舉人正德戊辰進士初授

泉州府志

卷之四十七

明循績

三九

崇仁知縣三年改增城遷至南京戶部郎中嘉靖初出
守太平鉞令崇仁時請改折京兌二米有才能聲寧庶
人欲勒致之鉞曰令可屬鏹不可易肝膽也及爲守多
建立興賢造士養老卹孤嘗築楊家姑溪壩建亭其上
由是姑水滌折不苦衝決又裁采石諸驛供應夫草馬
政羣長召種荒田歲省浮費金數千增穀至十餘萬石
又奏免水旱災傷沒豪右匿田入于學以贍士士民頽
之未幾歿民盡流涕後二十年祀于太平之名宦移檄
入郡祀鄉賢鉞善詩能書與關西呂柟友善尙寶李源

稱鉞詩挾江其委挾岷其奇子太毓孫奇棻

舊志參江南通志太

平府志
閩書

尤復字純卿號見齋晉江人祖聰成化閒以歲貢仕沛縣教諭父俊復少受易於蔡文莊清稱高弟正德庚午舉人會試後丁內艱連遭荒歉授徒廣南易粟以全活家族授鄒平教諭解經考文闡明底奧士若發蒙臺院趙公春延至省造就六郡俊士科第相望著道學口說濟下咸宗分校陝西會元趙時春出其門陞知石埭縣邑故稱饒向多姑息以利其私糧累科索下戶甲總窩比

泉州府志

卷之四十七

明循績

三

穿竊詞訟請証求勝政乖俗弊下車咨詢利病正體統除常例譏察責諸保甲聽訟惟務虛公寬猛互用信賞必罰朔望視學講論廸以脩身善行於是縣庭無譁賦稅莫逋夜戶不閉野無冤民然性不能脂韋取容竟遭讒解組民攀轅留涕有尤去尤不要之謠歸而承父歡葬祖及弟囊中盡罄諸縉紳延之師席講學論文藉以自給郡守俞咨伯禮致上賓辭不就年六十二卒石埭人立碑紀德載之名宦其書去位之由則曰操持清白守正不阿云弟和正德己卯經魁蘭谿知縣

節尤思所撰誌

陳奇字士特晉江人正德癸酉舉人銓新泰教諭庠中有
老聃像以孔子侍奇申毀之兩校鄉闈遷南京國子助
教轉河間府印馬通判盡草馬戶詞訟贖罰令納紙數
葉備案牘而已河間為京輔郡有印馬巡按巡鹽三御
史印馬御史欲抵人罪奇以直上御史駁却者數竟不
改御史曰判何拗也尋怒以他事會得巡鹽御史解乃
止已巡鹽御史語奇奇復不拜謝巡鹽御史亦不悅於
是交劾落職貧無行資有堂吏白奇御史劾公未得處
分有秋季馬尚可往巡亦資斧一助奇曰棄婦則不可

泉州府志

卷之四十七

明循績

三

復事事嫠婦則不可復改守吾嫠且棄矣鄉縉紳在都
下者憐其操為言於新巡鹽御史資給之始得攜孥歸
民曰菩薩去我閩書

郭克一字約之惠安人正德癸酉舉人少從莆陳茂烈學
嘉靖中署歸善教諭學舍在郭外敝壞日久諸生徒寄
空籍克一捐俸新之復分齋肄業之規申飭條教講說
經旨士心竦異諸司行部至惠州莫不嘆賞在任一年

丁內艱歸卒于家

閩書參廣東通志惠安志

洪熊字世美號方山南安人正德癸酉舉人司訓平湖陶

鎔士類如俞咨伯輩皆以科第顯擢天台令邑以勝景
士大夫游者踵接熊密斷橋道游者罕至邑中夫役需
辦之費十省五六民大德之台庫猶類營窟其中熊輪
役畀之吏無所措手爲奸邑喜訟理論之終以素性朴
直失上官及使客權棄官歸蕭然一室詩酒自娛不事
干謁咨伯來守泉絕不以私請其於嗜欲勢利淡如也

南安志

蔣孔煬字君和號悟庵晉江人正德丁卯舉人甲戌進士
初任通州知州下車問民利病清賦稅平訟獄吏無

泉州府志

卷之四十七

明循績

三

所容奸尤加意學校集諸生課業躬督所獎識皆成大
名州有宣家港度其地勢宜田顧謂邑耆老此地棄之
則荒蕪湫溢以畀鯢鮒用以畚插其中則上益縣官芻
輓而下可足百姓倉箱何百餘年來見不及此因力請
諸當道得不急贖緩佐以已俸墾之功就得良田可二
千畝通人賴之丁外艱服除陞南戶部員外遷郎中督
賦浙江江西蒐贖得乾沒巨贓株本窮其枝條徵積逋
溢於新賦皆已出於民未入於國者反命世宗特褒美
之改刑部郎中以才取忌投檄歸事母至孝躬爲烹飪

澣濯家居建祠堂而大宗小宗皆立祀田與旁派子姓
輪收尤酷愛其弟所有田宅皆產或割其半以畀稱觴
同堂嘉靖甲辰乙巳歲大祲飢殍載道倡里中縉紳有
力者輸直于開元承天二寺煮粥賑施三十餘日一時
賴以全活者數千命其本宗叔姪弟昆毋論老少每口
日授糧一升至於姊妹姑姪適人貧乏者所授米亦如
之里中侈談其事卒年六十七同年郭楠爲之狀而王

慎中銘之

舊志參閱書
王遵巖文集

吳希澄字克靜晉江人正德丙子舉人授廣東長樂知縣

泉州府志

卷之四十七

明循績

三

勸農桑廣積儲雖旱不害民以情訴者進見無時虛心
曉譬曲直咸平會有老監司貪黷無厭希澄恥爲阿狗
大拂其意久之復與爭獄竟爲所中歸隱靈源山下王
慎中贈之詩曰家在深山非避秦相尋正及桃花春近
看道氣着閒異暗接心期語下親兄子從憲

閩書

謝崑字鍾璞號次峯同安人正德丙子舉於鄉以親老乞
學職得金華訓導嘉靖丙戌捷南宮遇疾弗與殿試已
丑成進士歷知溧陽成安二縣持身潔而馭吏嚴溧陽
民喜爭動以財賄取勝崑一律以理法期年訟息在成

民尤安之擢南戶部主事監鈔北新關錙銖弗染商船
二稅取足常課雜費破格除之吏白除之必斂怨崑曰
寧怨歸已毋害歸商由是清操流聞得代惟圖書數肩
而已轉南兵部職方員外郎未任卒崑溫厚質實財利
不入于心生平不樂人逢迎亦不能逢迎人歷官十餘
年未脫寒酸遇匱乏弗恤惟賦詩讀書其卒也當道助
賻始克蓋棺同人重其行誼舉祀鄉賢閩書叅林次崖
文集同安志

伍鎧字文衛晉江人

正德己卯舉人
嘉靖丙戌進士

知潮陽縣力阻貪官

督徵驅逐鯨鱷邑子陳沈居鄉不法峻絕之為所陷械

泉州府志

卷之四十七

明循績

三

治京師潮陽人厚金幣遺官尉俾善視鎧已為立廉正
之碑事白改高淳惠政在民有兒殤解中鎧去邑民祠
鎧併及其殤兒改戶部郎為尚書許進梁所知改郎工
部陞南光祿少卿落職起知隨州再陞雲南僉事貴州
叅議先後按史以其無分寸私薦抑所察吏一準所裁

年八十餘卒

閩書

韋尚賢字思肖

次崖集
作思省

號鷺沙南安瀛溪人正德丙子舉

人辛巳進士授戶部主事督漕江南黽勉趨事糧運先
簡書二月至京從前未有也大司徒梁倫菴材器薦於

朝獲錫幣袞封貴溪相夏言欲建第府城聞其才囑吏部遷尙賢廣信府守異得託以行意及至郡殫心職業理詞訟平賦役六事畢脩部使者至郡不三日輒去曰郡有良守矣以才能登薦刺言託以治第悉置之罔以美官亦不應言銜之郡中四姓得罪於言每監司至輒希旨逮捕必致之死尙賢惻然白免之言怒甚言於吏部請改調冢宰汪鉉少宰翟韜知其賢爲調毘陵郡民扶老攜幼走送毘陵大郡也言益怒乃改九江地當衝要民力疲敝愛護休養一如廣信時章聖太后梓宮南

泉州府志

卷之四十七

明循績

三五

祔百凡旁午守令皆惶懼投檄去尙賢獨身任之事賴以濟江右十三郡民輻輳九江以廣信民久勞時相興作獨白免之撫按交章論薦繼賢守信者已致上卿而賢淹滯不動績上三日遷擢有期卒爲權相所擠遽報罷慨然登途畧無愠色家居徜徉山水課兒輩耕讀戒子姓毋侵凌鄉里郡邑長以公事至瀛溪必造訪政令不便民者輒正告之毫不及私年六十四卒鄉人皆流

涕孫綬萬歷壬子舉人

南安志叅林次崖文集

李璉字文用號懶齋安溪人正德中以明經授儋州學正

脩明倫堂以崇廟貌推贊節惠貧生課督有方儋僻處
荒服由是文風大振祀名宦後何督學祀之鄉賢吳溪志
明循績四

王佐

曾仲魁

黃澄

吳銓

陳健

蕭景腆

鄭琛

蔡克廉

張志選

尤麒

張文昭

呂文緯

泉州府志

卷之四十七

明循績

三

陳儲秀

莊深

張天叙

蔡宗德

陳露

汪旦

黃傑

王佐字子才同安人嘉靖壬午舉人初知睢州值河決竭
力捍禦河卒平睢人建回龍廟河濱生祀之擢高州同
知南戶部員外郎中以持議忤大司農出為兩淮運同
為人剛介在高佐齟齬解課者再而家甚清白屏居年八
十三矣睢人請於督學祀之名宦不知其尚在適移文

至今徐待贈之詩曰白頭如越世赤子未忘慈百畝家
無羨千秋食有餘亦竟以其年卒

閩書

會仲魁字思達號漸溪晉江人正德丁卯舉人嘉靖癸未
進士授順德令歲飢路有殍齒開廩平糶煮粥和藥飢
者飽羸者起邑負山阻海宿偷蟠結穴深藪密商旅晝
搜畜聚不敢在野仲魁蕩窟覆巢使民露積田閒行者
無虞法在募精卒除戎器謹候徼賊發必得安民而不
擾民既乃爲民畫便興利立社倉建社學訓誦課業具
有條式繼知順德者爲袁鉞政與相捋人以比之召杜

泉州府志

卷之四十七

明循績

三

擢禮科給事中監京庫局東南百物之貢內寺主之宮
府乖隔民輦輸入宮主者求賄無藝賄且半輸仲魁剔
刷蠹本省賄萬計主者夜懷千金入謁求稍寬弛正色
曰吾以上聞若死矣貸若死監法不可弛也其人慚退
始以役當輸官貢者皆相恐以破產廣斂他戶充賄名
曰汎費比所省旣多乃議今歲汎費旣難却還他戶而
使役者以賄餘爲家主者亦不能平爰徵其半入官而
盡罷以後汎費轉刑科右給事册封靖江出知嘉興府
以母老乞養歸母沒復補池州節齋厨傳篋篋諸交際

別置條法畿內新貴人目爲迂濶而自尊大會陳御史以巡江歲滿檄取紙筆費仲魁曰吾知爲民太守不知爲御史胥吏也御史恚曰太守慢我上疏論劾吏部持之會論者至京奏事爭益力考功重拂其意遂報罷既歸杜門不出郡邑長造訪賦詩不報謝人益高其風年六十八卒

閩書彙編廣東通志王遵巖文集

黃澄字廷肅號竹溪南安人正德癸酉舉人嘉靖癸未進士釋褐仕行人明制科道官員缺皆自行人選授人以得不得爲憂喜澄獨不就選遂以司副遷刑部郎出爲

泉州府志

卷之四十七

明循績

三

廣東按察僉事飭兵嶺西會徭劫高州朝議剿之督府以澄將中軍繇瀧水進屯羅銀破賊徒十有三斬首千一百餘級獲俘八百餘人牛馬器械無算督府上狀詔賜金幣高肇二府居民與生熟徭相半徭所藉者魚鹽徃時金不許其出入爲市澄令賈人得持魚鹽入峒獨不許其出耳熟徭或時至庭下獻茶蜜爲壽澄輒以魚鹽厚償之諸徭咸出望外終澄任無爲患者竟以峭直忤世歸隱竹溪之上與其族子河清相倡和其詩清明直達有王岑之致子養蒙

閩書

吳銓字秉衡晉江人受學於蔡清嘉靖初以歲貢授博羅
訓導擢陽春教諭平居嗜學而持身以禮無惰容無偽
言無私謁妄求爲學官集士有美質者使肄業學舍授
之易親爲講解夜則挈供具行視稽其勤惰皆翕然奮
興御史周煦廉其賢特疏薦舉以疾歸士咸思慕之蔡
元偉稱溫陵人物謂朱簡庵鑑李木齋聰蔡虛齋清陳
紫峰琛張淨峯岳黃逸所孟偉林龍峯同顧新山珀林
六川性之與銓爲溫陵十子雖名位不同皆無愧鄉先

生也

閩書叅廣
東通志

泉州府志

卷之四十七

明循績

三九

陳健字時乾號滄江同安人正德己卯舉人嘉靖丙戌進
士授刑部主事歷四川司郎中決讞鯁直不阿上意出
知南安府政務寬簡與民休息脩南安志南安人稱其
總挈綿邈持議宏遠調廉州府再知南寧爲政惟勤撫
綏不務因循歸田後課子孫崇先祀敦睦無閒孫榮祖

榮選

閩書

蕭景腆字世厚號貞軒晉江人父存成化丙午舉人應天
教授景腆習博士業棄而爲椽授定遠尉定遠經大盜
殘蹂之後百姓流離景腆與令弔死問疾脩城鑿池身

先畚鍤以毋憂去定遠人思之祠焉服除補尉長洲值
大饑奉委分賑民沾實惠時織造太監張志聰恣睢橫
索長洲令郭波持法挫之志聰忿甚誣令撓御造龍衣
執而倒曳之車後景腆聞之領所部弓兵奮追直前手
批志聰落其帽市民從旁觀者盡爲景腆張氣梯屋飛
瓦羣擲志聰志聰阻折而去竟奪令以歸志聰還訴世
宗有旨械下詔獄時令已先擢入爲工部主事亦與景
腆並下鎮撫司拷訊廷臣壯其義會疏救之令得落五
級而景腆仍調尉永從時吳廷舉巡撫吳中爲景腆立

泉州府志

卷之四十七

明循績

四

仗義英風之碑於長洲縣門景腆鐵面虬髯敦倫尙義
父所積俸餘悉以與弟謁選時有鄭姓授泉司倉以告
身質二十金比至泉不能贖卽以告身予之甫有京解
失水貸四十金賁於官歸無以償不問也其人歲時來
致祝止之復來在長洲與祝枝山沈石田唐伯虎雅相
慕向及被逮益欽其高義大節故所得諸名筆書畫獨
多常披閱以自娛年六十七卒孫騰鳳隆慶戊辰進士

兩淮運使

舊志叅江南通志
景壁集蕭氏行實

鄭琛字必獻惠安人衰之後嘉靖丙戌以貢授岷縣訓導

開龔勝會率士學教之先求放心復表王烈婦刲股之
廬以勵風化岷水暴漲半夜扣縣合門爲民請命承委
視水埋齒瘞殍賑業流亡陞三水教諭期會課程如岷
以邑庠新建萃傍縣之材爲更番講學之法乞休歸粵
志稱琛學有淵源甘澹忘物孫一濂一信一信守金華
類張做尹翁歸之爲人終廣西按察副使一濂思恩同
知居鄉有惠德

閩書

蔡克廉字道卿號可泉晉江人祐子少與梁懷仁並稱神
董嘉靖戊子己丑聯第進士時年甫十九除戶部主事

泉州府志

卷之四十七

明循績

聖

乞改南尋調北刑部主事陞員外郎中先是大同軍叛
總督劉源清逮下獄久不決及克廉治源清獄謂邊鎮
大臣論死以快叛卒非國體且源清先有助破寧庶人
功請宥之肅宗從其議劉得毋死用是得平恕名張延
齡者孝康皇后弟坐罪下詔獄先後提牢主事恐傷母
后心寬之帝廉知怒責尙書罪諸先後提牢者克廉坐
謫廣德州同知久之量移廬州府同知擢南京禮部主
客郎中出爲貴州提學僉事未行丁外艱起補江西提
學僉事陞廣東提學副使兩省士先後成進士數百十

人多爲名臣陞浙江右叅政江西按察使右布政使尋擢操江僉都御史癸丑倭突薄太倉城時克廉駐蘇星馳入州城乘堞冒矢石督將士固守飛礮擊殺賊三十餘人遁去被劾得白以原官起撫江西陞右副都御史總督漕運陳漕政八事請城寶應以防倭平通泰賊入爲戶部右侍郎俄轉左晉南京戶部尙書時年四十有九臥病邸中振武營兵變以減餉故射殺侍郎克廉以是罷歸尋卒克廉純明溫粹在泉與梁懷仁王慎中僉少年科第以文行相砥出與唐順之羅洪先鄒守益諸

泉州府志

卷之四十七

明循績

三

公徃復討論卓然有志於道在官當事穎識敏裁處繁應卒游刃有餘審察談論拓舊爲新推小至大闡微極著更出互生滾滾不窮世人盡推克廉才而克廉亦以是爲分宜相嚴嵩所知嵩當國遂注意推引而克廉於嵩不能有所救正世人以此訾議之然克廉爲戶部左侍郎時尙書方缺獨乞南曹其引嫌自遠有足諒者子

應麟吏部郎

舊志叅閩書廣東通志太倉州志

張志選號行吾晉江人嘉靖戊子己丑聯第進士授諸暨令俗多溺女以至情諄諭之所活萬計浙東民逸於法

士逸於禮怯義勇奸志選崇恥樹惇邑人蒸蒸向化以最遷戶部郎出爲常州知府值歲祲便宜收荒起白骨而肉之蠲宿逋撫流民諸可惠元元者無不爲之性耿介爲權貴所螫竟罷歸居家孝友侍父正衣冠竟日俸餘與昆弟均之治墳塋置祀田示子孫勿登枝而捐其本當事有咨詢地方利病者縷縷利害非公事不謁非公言不出口飲人以醇而一歸於長厚鄉里稱之

節張氏家傳

尤麒字國禎號見洲晉江人受業於易時中嘉靖戊子舉

泉州府志

卷之四十七

明循績

三

人授武城令邑小民貧地當孔道流離轉徙幾不可爲至則問疾苦罷不經之費與民休息巨猾商鳳鳴以武斷之才爲鄉人患捕置之法良善獲安有兄弟相訟壯年羅刑獄至白首不決出之庭諭以天性皆感泣聞之上官釋之王少宰之僕害人執而治之虐焰方張衆咸爲危不顧也委訊諸州縣獄多平反治存大體不務苛細夏津恩縣故城等邑時當繇諸民赴當事請委武城令往審編差役各得其所上官喜得人諸邑長亦心服邑接壤恩縣舊患水利不通民多失業流禍隣壑爲相

度疏築兩邑交頽屢報最行取擢南戶部四川司主事
士民請配祀東昌守芹山陳公至都門以疾卒年五十
三武城人聞訃羣聚一室哭臨焉麟天性孝友事父母
順志承歡敬叔父母如父母視從弟如弟撫異母弟妹
如子惇倫厚族人無閒言鄉評歸焉

節清源文獻
陳我度撰志

張文昭號西亭晉江人年十八爲諸生旋餼於庠嘉靖庚
寅歲貢授衢州訓導端楷樹範莊敬和樂日進諸生談
藝故精易義出其夙學發蒙擊節人人得所欲去監司
重其文行亟嘉獎焉遷賓州學正地雜犷獷無復儒風

泉州府志

卷之四十七

明循績

畧

條舉冠婚喪祭四禮以身標之遐邇蒸蒸向化與中州
埒直指陳少岳督學魏立峯並器重之秩滿擢高州教
授教如賓衢郡守歐陽公稱其古貌古心古學古行郡
人以爲實錄生平恂恂言不出口無甘詞軟態接人推
心置腹貌冷情溫其於孝友尤篤兄弟聯若手足旣而
浩然曰吾老矣安能爲首蓓折腰方杜門乞歸竟卒於

官

聞書叅張
氏家傳

呂文緯字道充號疊石同安浯州人嘉靖辛卯舉人授藍
山知縣爲民求便利日搜其蠹弊而芟除之才識敏瞻

庭訟一言而決胥吏靡竄手舊有徵輸餘銀吏以羨白
例充私費文緯請歸官充公監司大其請遍移旁邑曰
令不當如是耶往上官按行部邑庸鄙者或有需求至
藍獨無私饋吏懼見謫文緯不願卒皆敬重之居荒徼
間蠹蠻蕃育數患苦民黎一日掠至城下文緯勒兵追
捕俘數十以歸度其勢可盡殲建議平徭當事難之文
緯指畫陳可取狀遂委任其役按地圖部署兵所從入
率敢死士搗其巢窟徭窘乃求撫文緯曰聽撫卽吾民
也定爲約束而遣之徭遂平上其事于朝民立祠祀焉

泉州府志

卷之四十七

明循績

五

陞四川簡州知州未任而報罷文緯誠實果敢居官廉
而有爲其平徭之績尤偉而卒見排不錄中丞劉凝齋
在湖藩時詳其事及撫于閩益相敬重凡時政得失陳
說徃徃受聽其居家仁孝田宅盡讓與弟又置祀田三
十畝以奉祖先族黨交稱焉

採傳錦
泉文集

陳儲秀字舜弼號瑞山世爲晉江人徙居南安嘉靖辛卯
壬辰聯第進士授行人奉使魯藩厚贈辭弗受擢雲南
道監察御史清戎兩粵謂閩左之役尺籍功令具在若
影捕蔓引如罾苟亂魚畢弋亂鳥非作民父母心班令

所司俾覈實督發諸屬籍絕者勿濫逮迄竣事上得當以報大司馬而下以綏粵民粵中交口頌之丁外艱服除署河南道御史大計天下冰霜自矢會東粵按臣當代臺議僉推之既至熟悉民情利病政治便否張弛咸中窾會安南阻兵議剿撫不一與總督毛伯溫相機宜宣威德夷酋欵關輸貢上功賜寶鏹麒麟服暇時進士程藝講德龐尙鵬殷從儉節鉞閩中皆所甄拔積資當丙擢爲嚴嵩所擠遷河南副使董河道樹標振厲吏凜然奉法嘗河判官某苛而黑與直甄有連屬爲地廉其

泉州府志

卷之四十七

明循績

吳

不法狀嘆曰夫固蔓附而鷹攫者上下相蒙以庇墨吏奈法紀何檄下逐之直指銜焉適大計以蜚語中之去官歸山居采茹自給詩書自娛不問戶外事兵燹告警與莊用賓募鄉兵禦寇南邑無城與邑合夏汝礪鳩財集衆築之屹然金湯

南安縣志

莊深字靜源晉江人嘉靖辛卯鄉薦卒業成均遇世宗行藉田禮深作聖駕躬耕藉田賦祭酒王教上其文遂蒙睿賞授四會令劑量貧富以定徭役脩聖廟建尊經閣限程課士捐俸以賑貧士之婚喪處徭夷寬嚴有經

猶夷亦祠祀之為忌者所擠罷歸四會人祀之名宦嘉靖季泉中倭深先登北門守陴飯卒寇不敢攻竟退御史樊獻科致金帛羊酒其門曰為泉人謝公守城德也深善四體書尤長於徑尺

閩書

張天叙晉江人嘉靖辛卯鄉薦領教官分考湘江內簾其時取士皆外簾用事內簾具員而已天叙閱卷得顏鯨必欲御史登額御史不許天叙曰謂朝制何出聘幣還御史辭去御史不得已從之後鯨竟至大官知遂溪縣政尚廉平捐俸脩葺學宮樹亭闢舍創建書院集士講

泉州府志

卷之四十七

明循績

四七

藝其閒遂溪人祀之名宦

閩書叅廣東通志

蔡宗德字懋脩同安人嘉靖辛卯舉人通判廣州活漳泉之通番船者百餘人有甲盜葬乙地乙遷其棺他所甲以棄棺訟宗德佯不聽第約日令乙遷而棺果還故處又有弟亡僅一遺腹兒兄利其產謀一夫婦冒為已子復謀一人證之宗德訊佯怒令棄兒於水弟婦哀慟求免冒子者畧不動乃責諭其兄薄分以弟業丁艱復除台州活莆田被擄者十餘人調梧州卒子貴易孫獻臣

閩書

陳露字道奇晉江人嘉靖甲午舉人授武城教諭陞國子
博士肇慶同知肇慶古端州包孝肅嘗官其地露至名
堂曰佈包平反大辟不顯回異檄署德慶州賊有黃海
龍張快馬等倚犛蠻爲聲援肆剽掠露廉知大姓主名
結賊奸以自保者數人不繩以理密令約賊降者犒之
至期樵牛醜酒與酣飲候其醉出伏兵擒之皆就縛餘
黨盡平嘗至四會賑民飢德慶四會皆爲立祠以不能
取容罷歸子紹功字及卿萬歷庚辰進士仕廉州推官

遷潯州同知有文學

閩書叅廣東通志高要縣志

泉州府志

卷之四十七

明循績

四

汪旦字仲昭晉江人立信九世孫父瀚宏治甲子舉人由
山陰掌教遷泰順知縣嘗與王陽明講學辨論旦時數
歲輒解意義嘉靖壬午舉人乙未進士任江西金谿令
縣故有寺曰天竺寺有子孫堂四方婦女求嗣者齋禱
宿其中歸多娠者旦至官疑爲奸召伎女僞民婦往授
硃墨誠曰夜有人就若則塗之越日昧爽行香詣寺僧
悉出迎檢眎其身染硃墨者凡數輩遂收繫獄獄未卒
具忽心動命爲備是晚繫僧果毀獄出與邏者格鬪不
勝伏誅旦謂僧旣就繫而破械奪門非藉外應必不敢

爾更趣衆趨寺掩之至則寺僧已列杖明火將出衆急擊皆散走就擒廼傳爰書訊鞫論報具獄廢其寺盡得子孫堂地道複壁及諸幽秘爲奸狀窖金數萬兩有鐫湘吳州縣字者則皆僧行剽鄱陽中解京庫帑也事聞調繁吳江尋擢貴州道御史後以言事忤當事歸卒于家著有黃庭經註道德經註及評選李杜詩行世子萬

里孫紹芳俱舉人

雍正舊稿

黃傑字一貞號忍江同安人嘉靖乙未府學選貢第一歷西安麻城訓導海康教諭伊府教授致仕三辭署印操

泉州府志

卷之四十七

明循續

四九

若冰霜貧士有餽必力却之沐其陶鑄者甚多所至多有可紀而在麻城尤著其始至謂諸生曰吾初授官不寢竟夕念官名訓導豈漫也哉訓字從言從川朝廷欲吾與諸生言善相切劘也導字從首從之從寸欲吾首躬行示所之尺寸莫踰越也諸生聞之知傑欲舉其官矣傑多聞善談論對諸生竟日無一庸俗語聽者忘倦才者愛之中才者教之貧者恤之時以鄉先哲蔡清張岳林希元諸長者爲諸生誦之凡其行事不自點污亦不爲崖異外不急促而內默喻人於道旣轉海康諸生

祖送塞路傑留衣一襲爲代者別以示傳衣之意其後
代者亦勉効傑麻士賢之歸居橙山之麓屢延賓席不
赴學者稱忍江先生卒年七十八閩撫耿公定向其門
士也捐金治葬爲之傳楚粵皆祀名宦

閩書叅同安縣志廣東通志

泉州府志卷之四十七終

泉州府志

卷之四十七

明循績

五